

COMUNICATO n. 1618 del 28/05/2026

Gilte van earste van prochet finz as de 31 van agest. De hilf ver za gea' enkeing en de hoachen prais va de benzin u'ganommen va de Junta

Va de 28 van moi mu men kaven de tauerkòrt va 20 euro ver de zich ont ver de autobus: men schòlltet sa inn pet de smart card

[Mòcheno] Van pfinsta as de 28 van moi barts moglech sai' kaven en de zeitlerboteing va Trentino Trasporti ont Trenitalia de nai summertauerkòrt va 20 euro ver de òllgamoameivernsemittln as de gònze lònshòft van Trentin. Men bart meing prauchen de tauerkòrt van earste to van prochet finz as de 31 van agest as òlla de stòttbus ont ausstòttbus, as de lokalzich ont as de soalpont Trea't-Sardagna. Ver za meings prauchen miast men hom de smart card pet en aigene nu'm gilte ver de trentiner òllgamoameivernsemittln ver de òrbeter ont pensionatn. Ber as hòt nou nèt de kòrt mu sa vrong direkt en de glaichen zeitlerboteing: s prauchen lai a por to. De hilf ist kemmen u'ganommen va de Provinzialjunta no de vourtschbinn van president Maurizio Fugatti ver za gea' enkeing en de hoachen prais va de benzin. "A schea'na moglechkait ver òlla - van òrbeter as de pensionatn as hom minder abia 70 jor ont as meing nèt umensist der dinst hom - as, bail de doin zaitn as de kostn va de benzin gaheift hom se, meing pet an guatn prais pet de lokaln òllgamoameivernsemittln umadam gea'. S ist a tauerkòrt as gilte ist ver drai mu'netn, van prochet finz en agest, de derstellt a bichtega hilf ver ber as meivert se en Trentin, iberhaup ver òrbet, ober ver ònderst aa. An untestitz ver de familie ont ver ber as praucht de òllgamoamittln, as mu zaruckkriang an toal durch de virm as patschrim sai'", asou sok er der president Fugatti.

Do de oa'zelnhaitn va de iniziatif.

Abia schoa' derklort, men mu kaven de tauerkòrt en de zeitlerboteing va Trentino Trasporti ont Trenitalia Spa **van pfinsta as de 28 van moi 2026** ont s bart kemmen gem en de sèlln **as hom de aigenekòrt "òrbeter ont òndra" ont de aigenekòrt "pensionatn"** (kategori A, B ont D).

Der roastitl bart gem s rècht za meing prauchen de doin dinstn:

- Bus ont stòttbus ont ausstòttbus va Trentino trasporti SpA
- Ferrovia Trento-Malè-Marilleva
- Ferrovia della Valsugana zbischn Trea't ont Primolano
- Ferrovia del Brennero (lai nèt de dinstn IC, EC, Frecce) zbischn Borghetto ont Mezzocorona/Ora (de stazion va Ora mu men sa prauchen lai ver de roasn va oder keing de Val di Fiemme ont de Val di Fassa; s plaim aus de stilln ver anau/ano va Salorno, Magrè/Cortaccia ont Egna)
- Funivia Trento-Sardagna

Ber as nou nèt hèt de smart card mu sa vrong ont ausvilln de vrog (as men kann vinnen online aa), òlbe durch de tirlar va Trentino trasporti ont Trenitalia; de kòrt bart kemmen paratet en a por to ont de kostet viar euro (derzua en de zboa'sk euro van draimu'nettauerkòrt).

De Junta hèt nou tschrim de moglechkaitn za kriang zaruck s toal. Ber as schoa' hèt gamòcht de tauerkòrt gilte ver secks mu'netn oder ver a jor as luckt de summerzait, bart kriang zaruck s toal as bart kemmen garèchtn benns en de doi zait hèt zaitn lenger abia draisk ta. S kimmp nèt zaruck gem s toal ver de tauerkòrtn van a boch oder van a mu'net sai'se ver de stòtt oder aus va de stòtt aa.

Zaitn ont virm ver de vrog ver za meing kriang s toal barn kemmen gamòcht kennen vour de zeichena van prochet as de istituzional saitn va de Provinz ont va Trentino Trasporti.

Ibersetz gamòcht van Sprochtirl va de Tolgamoaschòft Hoa Valzegu' ont Bersntol

(cdt)